



**Inatsisartunut ilaasortaq Anthon Frederiksen
Inatsisartut Allattoqarfiat
/Maani**

Kommunini malittarisassanik naleqqussaaneq/iluarsaaqqinneq kommunit kattussuunnerisa kingorna sumut killinnera pillugu § 37 naapertorlugu apeqqummut nr. 063-imut akissut

Asasara Anthon Frederiksen,

Inatsisartut suleriaasianni § 37, imm. 1 naapertorlugu kommunini malittarisassanik naleqqussaaneq/iluarsaaqqinneq kommunit kattussuunnerisa kingorna sumut killinnera pillugu Naalakkersuisunut apeqquteqarputit. Apeqqutigineqartut uannut akisassanngortinneqarput. Apeqqutigineqartunut akissutigisakka apeqqutigineqartut tullerriaarnerat malillugit ataani takuneqarsinnaapput.

26-02-2016
Suliap nr. 2016 - 3556
All. nr. 2194203

Postboks 101
3900 Nuuk
Oqarasuaat (+299) 34 50 00
Fax:+299 34 50 02
E-mail: govsec@nanoq.gl
www.naalakkersuisut.gl

1. Kommunini malittarisassanik naleqqussaaneq/iluarsaaqqinneq kommunit kattussuunnerisa kingorna sumut killippa?

Akissut:

Naalakkersuisut Siulittaasuata Naalakkersuisoqarfiani pisortaanerusiasup Kanukokamilu pisortap ataatsimiinneranni ulloq septembarip 17-iani 2014-imi kommunit maleruaqqusaat/ileqqoreqqusaat kommunerujussuarnut nutaanut qanoq naleqqussarneqarsinnaanerannik isumaqatigiittoqarpoq. Naalakkersuisut Siulittaasuata Naalakkersuisoqarfia kommunini aalajangersakkat pineqartut naleqqussarnissaannut aalajangersimasumik pilersaarummik KANUKOKA-mut septembarip 22-ani 2014-imi allakkatigut nassiussivoq. Kommunit Namminersorlutillu Oqartussat pilersaarut taanna suli ingerlappaat.

2. Malittarisassat qassit iluarsaanneqarnissaat amingaataappat?

Akissut:

Maleruaqqusat/ileqqoreqqusat qassit naleqqussarneqarnissaannut amigaataanersut ilisimaneqanngilaq, kisianni Naalakkersuisut Siulittaasuata Naalakkersuisoqarfiani Nunamut namminermut immikkoortortap periarfissaq siulleq atorlugu sammisaq kommuninut eqqartugassanngorteqqikkusuppa.

3. Malittarisassat qassit iluarsaanneqareerpat aamma suut?

Akissut:

Maleruaqqusat / ileqqoreqqusat qassit maannamut naleqqussarneqarsimanersut ilisimaneqanngilaq Namminersorlutik Oqartussani tamatumunnga tunngasunik kisitsisitigut nalunaarsuisoqanngimmat. Taamaattorli nittartagaq www.inatsisit.gl innersuussutigineqarsinnaavoq, tassani kommunit ileqqoreqqusaat 13-it nutaat nassaassaammata, kommuninik aqqiussusseqqinneq sioqqullugu atuussimasunik taarsiiisunik. Tassunga tunngatillugu apeqqummut 2-mut akissutigineqartut innersuussutigineqarputtaaq.

Inussiarnersumik inuulluaqqusillunga


Kim Kielsen



Inatsisartut suleriaasiat § 37 malillugu, immikkoortoq 1 naapertorlugu matumuuna Naalakkersuisunut apeqquut imaattoq saqqummiuppara:

Naalakkersuisunut apeqquut:

1. **Kommunini malittarisassanik naleqqussaaneq/iluarsaaqqinneq kommunit kattussuunnerisa kingorna sumut killippa ?**
2. **Malittarisassat qassit iluarsaanneqarnissaat amingaataappat ?**
3. **Malittarisassat qassit iluarsaanneqareerpat aamma suut ?**

(Inatsisartunut ilaasortaq, Anthon Frederiksen, Partii Naleraq)

Tungavilersuut:

Naluneqanngitsut kommunit 18-ungallarmata, malittarisassat assigiinngitsut atuutsinneqartut, kommunit sisamaannanngortinneqarmata, malittarisassarpasuit kommuninut nutaanut naleqqukkunnaarput, taamaattumillu naleqqussarneqarlutik kommuninut nutaanut naapertuuttunngorlugit iluarsartuunneqarlutik.

Suliat taakku sumut killinnersut paasissallugu innuttaasuniit pisariaqartinneqarpoq, tassami maannamut apeqquutit assigiinngitsut sulii innuttaasut akornanni apeqquutigineqartarput, ilumut malittarisassat taakku sulii atuunnersut ? imaluunniit allanik taarserneqareersimanersut ?

Ullut suliffiit qulit qaangiutinnginnerani akineqarnissara kissaatingaara.